

**UCAPAN PERDANA MENTERI DI MAJLIS KESYUKURAN
BAGI PENERIMA-PENERIMA BINTANG KURNIAAN
DYMM SULTAN JOHOR ANJURAN UMNO BAHAGIAN
JOHOR BAHRU DI KELAB GOLF, TASEK UTARA,
JOHOR BAHRU PADA 18 MEI, 1979.**

Y.A.B. Menteri Besar Johor, Tan Sri Dato Haji Othman Sa'at selaku Pengerusi Jawatan Perhubungan Negeri Johor, Pemimpin-pemimpin dan ahli-ahli UMNO Bahagian Johor Bahru, Wakil-wakil Parti anggota Barisan Nasional Johor Bahru, Tuan-tuan dan puan-puan yang dihormati sekalian.

Saya bersyukur kerana dapat bersama-sama hadir di Majlis yang permai ini bagi meraikan penerima-penerima bintang kehormatan kurniaan Duli Yang Maha Mulia Sultan Johor. Saya mengucapkan berbanyak terima kasih serta setinggi-tinggi penghargaan kepada UMNO Bahagian Johor Bahru kerana sudi menjemput saya berdua ke Majlis ini.

Saya sukalah mengambil kesempatan ini mengucapkan tahniah kepada semua penerima-penerima bintang kehormatan. Pengurniaan ini hendaklah menjadi satu perangsang kepada mereka itu sendiri untuk bergiat dengan lebih cergas bagi menyumbangkan tenaga dan fikiran terhadap kemajuan dan kebajikan masyarakat. Majlis ini sewajarnya menjadi satu perangsang bagi meningkatkan minat dan kecenderungan orang-orang lain, supaya mencurahkan khidmat bakti secara jujur dan ikhlas kepada rakyat. Berkhidmat kepada masyarakat memanglah satu amalan yang baik. Lebih-lebih lagi jika kita melakukannya tanpa mengharapkan sesuatu balasan. Membuat amalan jariah kerana Allah akan dikurniakan pahala di hari akhirat.

Bukanlah menjadi satu perkara yang senang mengamal khidmat bakti dengan secara sukarela. Ia memerlukan ketabahan, kesabaran dan ketekunan, serta kejujuran. Biasanya usaha seperti ini selalu menghadapi berbagai rintangan dan halangan. Kesulitan-kesulitan ini hendaklah disifatkan sebagai cabaran dan seharusnya tidak sekali-kali boleh melemahkan semangat dan minat kita untuk terus berusaha supaya berjaya. Kejayaan akan membawa kepuasan hati dan menggalakkan kita untuk terus menjalankan usaha dan khidmat bakti membantu rakyat yang miskin dan daif yang selalu memerlukan pertolongan.

Inilah sewajarnya menjadi sikap setiap pemimpin dan ahli UMNO terutamanya dalam kawasan-kawasan bandar seperti Bahagian Johor Bahru ini. Sifat-sifat yang mulia seperti ini akan dapat menarik minat dan kecenderungan rakyat terhadap parti kita. Jasa-jasa seperti ini akan sentiasa di ingati dan dikenang oleh golongan yang menerimanya. Dengan jalan ini pengaruh parti akan menjadi semakin meluas. Khidmat bakti yang berlanjutan seperti ini sudah tentu membawa hasil yang lebih berkesan lagi berkekalan, terhadap menawan dan memperolehi keyakinan dan kepercayaan rakyat.

Parti kita telah diberi amanah oleh rakyat dalam Pilihanraya Umum yang lalu. Sewajarnya kita melipat-gandakan usaha kita bagi memenuhi harapan rakyat serta cuba menunaikan segala janji-janji yang terkandung dalam manifesto kita itu. Pucuk pimpinan parti telah berusaha dengan bersungguh-sungguh melakukan apa jua yang patut supaya negara dan rakyat seluruhnya dapat kekal hidup dalam aman, makmur dan sejahtera.

Hadirin sekalian,

Tugas dan tanggungjawab kita dalam masa lima tahun ini adalah berat dan setiap kita samada Wakil Rakyat, Wakil-wakil dalam Majlis Bandaran, Majlis Daerah atau Majlis Tempatan, hendaklah menunaikan kewajipan mereka masing-masing supaya parti kita tidak akan mengecewakan harapan rakyat. Kita perlu mengekalkan pengaruh parti kita serta memelihara kepercayaan dan keyakinan rakyat. Di samping itu kita mestilah mengukuhkan perpaduan dan kekuatan parti kita supaya kita sentiasa bersedia menghadapi sebarang cabaran.

Sebagai kawasan bandaran yang sedang pesat menjalani perubahan pembangunan, Bahagian Johor Bahru menghadapi banyak masalah. Kebanyakan masalah-masalah ini adalah rumit dan kompleks. Bilangan penduduk yang kian bertambah, kekurangan perumahan, pertumbuhan kawasan-kawasan rumah setinggan, pengangguran dan penyalahgunaan dadah di kalangan belia-belia menambahkan lagi masalah-masalah yang sedia ada. Kerajaan memerlukan tenaga, masa yang panjang dan kewangan yang besar bagi mengatasi masalah-masalah ini. Kerajaan Persekutuan dengan kerjasama Kerajaan Negari sentiasa cuba dengan sedaya-upayanya bagi mengurangkan tekanan-tekanan yang timbul dari masalah-masalah yang dihadapi oleh rakyat dan penduduk di kawasan dan daerah Johor Bahru.

Saya harap pemimpin dan ahli-ahli UMNO, serta parti-parti anggota Barisan Nasional yang lain dapat memahami kedudukan dan kesulitan kerajaan. Adalah menjadi tugas utama mereka ini menjelas dan menerangkan keadaan ini kepada rakyat dan penduduk. Kerajaan memanglah bersimpati dan menginsafi kesulitan dan masalah yang dialami oleh rakyat dan penduduk di kawasan ini. Sebagaimana yang telah saya katakan tadi, bahawa Kerajaan Persekutuan dan juga Kerajaan Negeri tidak putus-putus berikhtiar bagi mengatasi dan seterusnya menyelesaikannya.

Saya berterimakasih kepada ahli-ahli Jawatankuasa UMNO Bahagian Johor Bahru di atas usaha mereka menghadapi masalah-masalah yang timbul itu. Beberapa biro yang telah ditubuhkan bagi mendekati dan mengkaji semua masalah-masalah membuktikan hasrat dan azam mereka membantu rakyat dan penduduk bagi meringankan tekanan-tekanan keadaan hidup disebabkan masalah itu. Saya harap pihak-pihak yang berkenaan di Majlis Bandaran dan Pejabat Daerah dapat memberi kerjasama dan sokongan di atas usaha-usaha yang dijalankan oleh UMNO Bahagian Johor Bahru.

Perancangan jangka panjang dan jangka pendek perlu disusun dan dilaksanakan di Johor Bahru bagi mengatasi dan menyelesaikan segala masalah. Saya penuh yakin satu langkah yang berkesan akan diambil sebaik sahaja pihak yang berkuasa dan Jabatan-Jabatan yang berkenaan dapat mengesan dan mendekati perspektif segala masalah-masalah di Johor Bahru ini. Oleh yang demikian, rakyat dan penduduk yang terlibat haruslah bersabar.

Hadirin sekalian,

Akhirnya, saya sekali lagi mengucapkan berbanyak terima kasih serta setinggi-tinggi penghargaan kepada semua Ahli Jawatankuasa dan pemimpin UMNO yang lain di Bahagian Johor Bahru, di atas penghor-matan yang telah diberikan kepada saya malam ini. Saya mendoakan mereka selamat maju-jaya.

Terima kasih.